

408 التدريب عن بعد: الإشراف على العلاج النفسي (21)

ظهور أعراض واختفاء أعراض، وجرة التحريك

د. محمد أحمد: هي بنت عندها 20 سنة بتدرس في معهد من المعاهد الخاصة، الأم ربة منزل وأبوها مهندس، ومستورين قوى، هي جاتلى من 3 شهور كانت المشكله الرئيسيه اللي هي بتشتكى منها واللى والدتها وصلتها لى كانت فيه مشاكل بينها وبين أمها، مافيش أى تفاهم ما بينهم وعصية زيادة والبنت طول الوقت بتشتكى إنها مخنوفة وعباط بدون سبب ومش عارف إيه، لما قعدت أنا مع أمها أول مرة لقيت إن أمها اعتمادية خالص سلبية، وغير ناضجة فعلا، طول عمرها كان لازم يبقى فيه حد شايلها طول الوقت، واخذ ده يبقى هو المسئول عن كل حاجه سواء لما كانت في بيت أبوها او حتى لما اتجوزت، البنت دى من صغرها خالص وهى اللي شايلة المسئولية في البيت وكانت في الأول مبسوطه إنها بتشيل مسئوليه حاجه اكبر منها، بس لما كبرت شويه اكتشفت إن الحاجات دى كلها أمها بتفرضها عليها وإن ده واجب عليكى انك تعمليه، انك تريحيني وتعملى وتعملى وتعملى، كان فيه مشاكل بينها وبين أمها، ومع ذلك مستمرة في الدور، وده تقريبا أصبح زى نخط علاقتهم وحياتهم لحد ما بقى طبع كده في علاقة البنت دى بكل الناس اللي حواليتها، إنها طول الوقت هي اللي متعوده تدى وما عندهاش استعداد إنها تتقبل من أى حد حاجة، يعني دايما تعمل هي سند للناس اللي حواليتها لكن ما بتعرفش إن حد يعملها حاجة أو دعم، ما تعرفش حتى تستقبل ده لو حد حاول.

المهم في البداية اشتغلنا شوية في علاقتها بوالدتها وإن ما يبقاش فيه الصراع اللي شغال عمال على بطال كده يعني هي تفوت شوية لأمها وأمها تستحمل شوية، لغاية لما الدنيا تعدى، بصراحة هي اتحسنت خالص في اخته دى لقيت والدتها حتى بتكلمني بتقول ان علاقه بينهم بقت احسن، ماعداش فيه المشاكل بالحجم الأولانى، بس الشغل مع البنت بقى أظهر لى حاجتين جُذاذ، انا ماعرفتش اتصرف فيهم، يعني لما شيلنا الغطا والخناقات اللي هي مستمرة مع الام دى لقيت ظهر في البنت حاجه زى وسواس قهري على مستوى التفكير ولدرجة أقل في السلوك.

د. يحيى: بقالك اد ايه معاها؟

د. محمد أحمد: 3 شهور

د. يحيى: منتظمة؟

د. محمد أحمد: آه، مرة كل اسبوع آه

د. يحيى: الحاجات اللى ظهرت دى ماکانتش موجودة قبل كده؟

د. محمد أحمد: خالص

د. يحيى: إيه مظاهر الوسواس ده

د. محمد أحمد: إنها مش نضيفة، ان هى بيجلها فكره كده إنها ممكن تنزل الشارع وهدومها تقع وتبقى عريانة والناس تبص عليها

د. يحيى: بتشوفها فین، الجلسات يعنى

د. محمد أحمد: هنا فى المستشفى، والوسواس ده بدأ فى شكل أحلام، ساعات تحلم نفس الخلم ده إنها فى الشارع وهدومها واقعة والناس بتشوفها وتحصى مخضوضه من النوم.

د. يحيى: أنا حولتها لك؟

د. محمد أحمد: لأ، هى جت لى عن طريق عيان كان بييجلى هنا فى المستشفى

د. يحيى: هل كانت قبل ما تعيا خالص فيه حاجة من اللى ظهر جديد ده؟

د. محمد أحمد: هى كانت بتدقق فى كل حاجة وتحب الإتيقان طول عمرها، لكن هو ماوصلتش أبدا لمرحلة الوسواس على مستوى النضافة مثلا،

د. يحيى: وبعدين؟

د. محمد أحمد: طبعا لما الحاجات دى ظهرت، أنا فحّرت هنا وهنا لقيت فيه كبت فظيع لاحتياجاتها الجنسية بشكل صعب، يعنى حتى ما عندهاش القدرة انها تعبر إن فيه حاجة اسمها جنس عندها من أصله، لا رغبة ولا خيال، ولا حاجة.

د. يحيى: إنت قلت عندها كام سنة؟

د. محمد أحمد: 20 سنة

د. يحيى: المعهد اللى هى فيه كام سنة؟

د. محمد أحمد: 4 سنين

د. يحيى: فيه تاريخ مرض نفسى فى العيلة؟

د. محمد أحمد: أمها كانت كلمتنى إن أخوها تعبان شوية، ومش عارف ايه وبتاع وعايظه حضرتك تشوفه، أخوها ده اصغر

منها بسنتين عنده 18 سنة، لما جابوهول لقيت الواد بيسمع أصوات بقاله 3 سنين وان هم يعنى زى ما يكونوا ناكيرين الحكاية، أو فاكرين الواد بيدلع ويبستهيل عليهم ومش عاوز يذاكر وخلص فسايينه خالص، ورافضين القصة دى تكون قصة مرض.

د. يحيى: 3 سنين يعنى من سن 15 سنة عنده هلوسة؟ هى هلوسة ولا صور أصوات خيالية؟

د. محمد أحمد: لأ، هلوسة، أصوات حقيقية بيسمعها

د. يحيى: إنت عارف الفرق بين الهلوسة وبين الأصوات الخيالية؟

د. محمد أحمد: لأ، أنا أعرف إن فيه صور خيالية بصرية، لكن أصوات خيالية صعب شوية، وما أعرفهاش.

د. يحيى: عندك حق، هى أصعب، الهلوسة السمعية زى صوتى كده بالضبط، أما الأصوات الخيالية فهى تبقى ساعات همس من بعيد، ساعت تفكير بصوت عال مسموع، ساعات حكاوى محبوكة شويتين زيادة، مش مجسمة كده ومحسوسة، الأصوات الخيالية نابعة من خيال مصنوع، مش زى الهلوسة اللى هى إدراك فعلا، إدراك حسى مش خيال منسوج، إدراك زى ما أنت سامع صوتى كده بالضبط.

د. محمد أحمد: ده بالنسبة لأخوها إنما السؤال هوا بالنسبة لها هى

د. يحيى: أنا فاهم، لكن برضه عايز أسأل: فيه حد ثانى فى العيلة مريض؟ مريض قوى؟ يعنى مرض عقلى؟

د. محمد أحمد: بنت خالتها عندها نهم مرضى، إفراط فى الأكل، بس على حد ما قالوا مفيش مرض شديد يعنى

د. يحيى: طيب نرجع لسؤالك تحديداً؟

د. محمد أحمد: أنا دلوقتى مش عارف أفهم الحاجات اللى ظهرت دى، سواء الوسواس أو اكتشاف الكبت الفطيع ده، أنا مش عارف اتصرف فيهم إزاي فى وسط الجو اللى البنت عايشه فيه ده، أعمل ايه؟!

د. يحيى: هى بتيجي هنا المستشفى إزاي؟ المواصله يعنى؟

د. محمد أحمد: بعربيتها

د. يحيى: هى شخصيا معاها عربية؟!

د. محمد أحمد: آه

د. يحيى: بتاعتها؟!

د. محمد أحمد: لأ مش بتاعتها لوحدها، هى بتاعتها وبتاعة أخوها يعنى

د. يحيى: أخوها أبو 18 سنة ده؟! اللي بيهلوس؟

د. محمد أحمد: أيوه

د. يحيى: وبتديك ملاليم مش كده؟

د. محمد أحمد: الحمد لله

د. يحيى: طيب، كتر خيرك، إنت دلوقتي بتعرض حاجة شديدة الأهمية في العلم والممارسة، اللي هي إن أعراض تظهر أثناء العلاج ما تكونش موجودة قبل كده، ده ماهوش دأب سيء أو سلي، مادام العلاقة منتظمة، وإنت في إيدك الدوا طالع نازل، ما يصحش تخاف قوى من الحكاية دي، دي ساعات بيبقى لها معنى إيجابى، يعنى بيبقى معناه ساعات إن العلاج حرك الساكن، مش كل سكون سلامة، والتحريك ده بيقلب اللي موجود، فيظهر على السطح بأشكال أخرى، ويبقى في متناول العلاج، إحنا قلنا كده كثير في حالات العلاج الجمعى مثلاً، لما يظهر اكتئاب جد جد، معناه غالباً إن فيه مواجهة حقيقية بدأت مع عالم الداخل الحقيقى، أو مع رؤية مؤلمة للواقع، المسألة هنا عايضة ضبط الجرعة، مش نعتبرها مضاعفات ونلحق نغطيها بالدواء، أو بالهرب، مش إحنا اتكلمنا في الحكاية دي كثير قبل كده؟

د. محمد أحمد: أيوه أنا سمعتها من حضرتك فعلاً

د. يحيى: لما تظهر الحاجات دي ساعات بتكون علامة على بداية تغير نوعى، حتى الشعور باحتمال الانتحار ساعات بيقى إعلان إن نمط الشخصية، نمط الوجود الموجود أصبح على وشك التغير النوعى، والانتحار هنا بنترجمه إلى التخلص من هذا النمط، مش من الحياة، يعنى لما واحد يلاقى نفسه إن العلاج عمال يخليه يتغير، وإنه حايغير كله، فيقرر إنه موافق عالبركة، زى ما يكون بيقدر إنه ينهى هذا النوع من الوجود، لصالح حاجة واعدة أحسن، الشطارة إنه ينهيه علاجياً مش فعلياً، المأزق ده بيحصل في العلاج الجمعى أكثر من العلاج الفردى، في حالتك هنا ده ما ظهرش في شكل انتحار، اللي ظهر أعراض شديدة الوضوح زى اللي انت قلتها دي، لكن كونها تظهر بعد 3 شهور يعنى بعد 12 مرة أو 11 مرة، أنا أعتبر إن دي مدة قصيرة مش مريحة، أو ربما إنها شطارة منك إن البنث إنت اكتسبت ثقتها بسرعة، بس ضبط السرعة ضرورى، مش كل سرعة جدعنة.

العلاج النفسى لما بيقلبها بيقلب التركيبية اللي كانت ماشية بيها قبل كده، التركيبية اللي أظهرت الأعراض اللي جت بيها على السطح، وظيفة الأعراض عموماً إما أنها تعبر عن اللي موجود، يا إما أنها تغطى اللي موجود، يا إما الاثنين مع بعض، وفي الحالة دي الظاهر إنك انتقلت من منطقة الإعلان بالأعراض إلى منطقة التهديد بالتعرية وبسرعة التخبية لأعراض ثانية بأعراض برضه، كده العلاج اللي انت بتمارسه باين عليه عملية نشطة، المسألة ماهياش تحسيس وتلصيم، ماهياش إن فيه قلق وبننتخلص منه، العلاج هنا بيقول إن فيه

علاقة ولما يبقى فيه علاقة يبقى فيه فرصة لتحريك محسوب تستعيد بيه المريضة فرص العودة إلى مسار النمو، وساعتها يظهر اللي يظهر واحدة واحدة، هنا في حالتك دى فيه حاجات اتقلبت، الحكاية عايضة وقفة فعلا زى ما أنت بتعمل دلوقتى.

ليه أنا سألتك عن تاريخ العيلة وعن إن فيه أمراض عقلية ولا لأ، عشان إنت لما بتقلّب، لازم تعرف طبيعة استعداد المحتوى اللي بتقلّبه. وبرضه خطورته، تقوم ما تتحمش قوى، تخلى إيدك حنيئة، لو اللي جوه ممكن يضرب يقلب، يعنى لو فيه فى العيلة استعداد للتفجّر، أو للتفجّر، تبقى البنت مستهدفة، يبقى إنت عملت حاجة كويسة بالتحريك من حيث المبدأ بس لازم تضبط الجرعة بقى، احنا عموما بنسعى للكشف عن اللي موجود واحدة واحدة علشان ما تبقاش الحكايات مستخبة تقوم تشوه الوجود كله تحت عنوان سلامة ظاهرة، والميزة هنا عندك إن التحريك أظهر مستخى خطر، ساعتها إنت بتخش بشوية دواء علشان تقلل من نشاط اللي ظهر لك ده لحد ما تستوعبه البنت معاك، وتمثله، يعنى تهضمه ويبقى جزء منها.

حكاية الهلوسة أو الصور اللي عند أخوها مهمة جدا حتى لو ما راحش لدكتور نفسانى، حتى لو ما أجننش، حتى لو هي خيالات مجسدة مش هلووسة، ما فيش هلووسة تقعد 3 سنين هي هي، ساعات تبندى في السن دى هلووسة بصحيح، لكن لما تطول المدة 3 سنين من غير علاج ومن غير مضاعفات ممكن تقلب صور، الهلوسة تقريبا زى ما تكون بتشوف مسرح بنى آدميين لحم ودم، إنما الصور الخيالية زى السينما القديمة خصوصا، يعنى لو كان اللي عند أخوها هلووسة حقيقية يبقى التهديد أكثر، وتبقى ظهور الوسواس عند البنت دليل على إنها بتحاول تغطى التحريك اللي أظهر الهلوسة عند أخوها، بتغطيه بالوسواس دى، يعنى أنت بتعمل تحريك، تقوم الأمور تتنط منك ومنها، تروح هي مغطياها بأعراض جديدة، تظهر الوسواس، تعرف إن اللي جوه ابتدا يقرب من السطح، فهي راحت مظبطاه بالوسواس دى.

إنت قلت ان هي لما بتقربوا للكلام عن الجنس، هُش هُش، حتى ما بتبقاش عارفه حاجة اسمها رغبة ولا خيال، وما تنساش إن البنت دى كانت شائلة أمها غصن عنها من أيام ما كانت طفلة، وأمها هي اللي عيَّله، يعنى البنت اتولدت واستلمت دورها عجوزة من بدرى، دا حتى العواجز ياشيخ بيسمحوا للجنس يتحرك إن شالله مع عجز التنفيذ، البنت يا عيني أبدأ، زى ما قلنا هُش هُش، من أصله، يبقى يمكن اللي قرب على السطح مش بس تهديد بالتفكك أحسن يطلع هلووسة زى أخوها، لأ ممكن برضه يكون الجنس المكبوت ده أخرجك بعد الطمأنينة لك، للعلاج، الحالة دى يبقى جيد جدا لو كملت واحدة واحدة.

هو العلاج النفسى عبارة عن إيه، إن احنا بنعمل تحريك لوقفة، وبنعمل تقريب للى جوه من اللي بره، وبالعكس، مش عشان نفرك أى تصالح والسلام، لأه، عشان يتحركوا مع بعض في اتجاه صحيح، أظن إن ده شئ جيد،

فاضل بقي حسابات التدخل: هل ندى دواء ضد الوسواس أو مهدئات عظيمة (نيورولبتات) علشان نهدي اللي جوه شوية؟ هل نسيبها من غير دوا مادام العلاقة بتنمو والبنات منتظمة في الحضور وأهلها أصبحوا معقولين ومتعاونين؟ ده كله يتحسب خطوة بخطوة.

لازم تحدد موقفك انت أول بأول من الحكايات دى وأهم حاجة هي مسألة ضبط الجرعة، يعني ما احنا قلنا إن العلاج النفسى وقت وتوقيت وجرعة، مش كده ولا إيه؟ كل ده تحدده مع نفسك ومعها ومعانا إذا حبيت، وماتنساش علامات ومحكات ومقاييس الحياة الواقعية طول الوقت، يعني تخلى بالك من دراستها ونومها وعلاقاتها مع اللي حواليتها غير أمها، وانت قلت لنا حاجات كويسة عن تطور علاقتها بأمها نتيجة لتغيرها، وتأخذ بالك إذا كان ظهور الوسواس دى بيعطلها، بندى هنا ممكن نيورولبتات بجرعة متوسطة يمكن أهم من مضادات الوسواس، يعني مثلاً ستيلازين أو حاجة مكافأة، واحنا نخلينا فاكيرين حكاية أخوها واللى عنده، ونعمل كده واحنا بنكمل في المناطق اللي انت شغت فيها كبت فظيع دى،

الله أعلم الحكاية هاتشى إزاي، إنت وشطارتك، المسألة عايزة وقت، وانت بقالك يادوب ثلاث شهور، ومسألة الافراج عن المشاعر الجنسية لأول مرة في السن دى مش سهلة في مجتمعنا خصوصاً، يعني ما نفرحشى قوى إنها سمحت للطبيعه البشرية اللي جواها أنها تطلع إلا بمقاييس المجتمع اللي هي عايشة فيه، وبرضه خلى بالك من تشابه الحلم مع الوسواس، وإن الاتنين بيشاورا على التعزى، وعلى الجنس في نفس الوقت، وده عايز شرح تانى طويل لو تطور العلاج وسمح بيه وأنت سألت فيه،

أنا مش فاهم لحد دلوقتى هما سايبين أخوها كده إزاي، ومعتبرين إن الأصوات دى حاجة ماتشغلشى، بس كويس إن أمها طلبت تستشيري، لأ، وهى جابتهولك فعلاً، ما هو ده برضه دليل على شطارتك وعلى ثقتهم فيك.

فيه صنعة ثانية أنا ما أعرفش فيها قوى، ومش بامارسها بمنهج محدد، يعني بافهم فيها من بره بره، خفيف خفيف، هي حكاية العلاج الأسرى، أنا بنتى وزميلتها في قصر العيني بيشتغلوا في الحكاية دى، وأنا باحوّل لها حالات، وبصراحة النتائج مش بطالة، وهى بتحكيلى، والعيانيين اللي باتابعهم ويروحوا لها بيحكوا لى، الصنعة دى إن العيلة كلها أو أغلب أفرادها، اللي عيان، واللى مش عيان، يحضروا جلسة علاجية بانتظام، والتركيز يبقى على ديناميات العلاقات في الأسرة وده يكون مهم أكثر لما يكون أكثر من فرد من أفراد الأسرة مريض أو عنده أعراض، يعني العيلة دى مثلاً: عندك البنت وأخوها رغم إنه مش تحت العلاج، والأم العيلة المعتمدة زى ما انت وصفتها، يعني الحكاية تستاهل، تقدر تسأل د. منى وتستشيرها ونبدأ واحدة واحدة لو العيلة عندها استعداد.

د. محمد أحمد: ربنا يسهل

د. يحيى: بصراحة دى حالة جامدة، وانت ماشى تمام، ربنا يوفقك.